

SARS le DTIC ba qala ho aba diaparo le dieta mahlatsipeng a dikgohola tsa KZN ba phelang dibakeng tsa tshireletso.

Tshwane, 2 Pudungwana 2022 - Boiteko boo ho bona Ditshebeletso tsa Lekgetho tsa Afrika Borwa (SARS) le Lefapha la Kgwebisano, Indasteri le Tlhodisano (DTIC) ba kopantseng matsoho le Dikgwebo le Mekgatlo ya Basebetsi ho fana ka diaparo, dikobo le dieta tse hapilweng ho mahlatsipa a dikgohola mane KwaZulu-Natal bo se bo le mokgahlelong wa bobedi. Sena se akaretsa nyehelo ya diaparo le dieta ho mahlatsipa a dikgohola.

Boiteko bona, bo bitswang *Project Sizani* (We all Help), bo bile teng ka mora ho tsebahatswa ha maemo a qomatsi ke Mopresidente Cyril Ramaphosa e le ho arabela dikgohola tse etsahetseng ka Mmesa monongwaha, le tse bakileng morearea provenseng ena, tsa bolaya batho ba fetang 400 le ho senya matlo a fetang 8 500. Dikarolo tse ding tsa diprovense tsa Eastern Cape, North West le Free State le tsona di wetswe ke koduwa ena ka lebaka la dikgohola tsena tsa Mmesa.

“Le ha projeke ena e tobile ho fokotsa kgahlamelo e hodima batho bana, e boela hape e tobile ho kgutlisetsa seriti sa bao ba ileng ba sala ba hloka letho ka lebaka la koduwa ena. Se kgannang boiteko bona haholo ho feta eng kapa eng ke Botho,” ho rialo Mong. Patrick Moeng, Mohlanka wa Phethahatso wa Yuniti e Tsepamisitseng Maikutlo ho tsa Oditi: Lekgetho le Hlophisitsweng le Ditlolo tsa Molao tsa Bolaodi ba Meedi mane SARS, ebile e le moetapele wa *Project Sizani*.

Boiteko bona bo akaretsa kabo ya tse ding tsa dimilijone tsa ditone tsa dithoto tse akagang ka hare diaparo, masela. dieta le tsa indasteri ya matlalo (CTFL) tse neng di hapuwe ke SARS ho tloha ka 2018, tseo ho neng ho lokela hore di senngwe ho bapa le Molao wa Bolaodi ba Meedi wa 91 wa 1964, o phethahatswang ke SARS, mmoho le tumellano ya NEDLAC ya 2009 le 2020, e bolelang hore dithoto tse hapilweng di tlameha ho senngwa ka sepheo sa ho qoba ho phatlalatswa ha tsona mmarakeng wa Afrika Borwa.

Mokgahlelong wa pele, o qadileng ka Phuptjane monongwaha, nyehelo e ile ya qala ka dikobo mane KZN, ka lebaka la tlhokeho e kgolo e bileng teng ka mora dikgohola moo makgolokgolo a mahlatsipa a dikgohola tsena a ntseng a dula diholong tsa baahi (boitshireletsong).

Mokgahlelo wa bobedi o akaretsa nyehelo ya diaparo le dieta mahlatsipeng a dikgohola a hlwailweng diterekeng tse fapaneng tsa bomasepala diprovenseng tsa KZN, EC le NW. Boiteko bona bo batla bo le tshopodi ka lebaka la kelohlolo e lokelang ho ba teng bakeng sa ntho ka nngwe eo ho tla beng ho nyehelanwa ka yona.

Boiteko ba sehlopha

Sehlopha sa Puso sa Tshebetso (GTT) se akaretsang ditho ho tswa ho SARS, DTIC, Mekgatlo ya Basebetsi le indasteri ya CTFL ba jara boikarabelo ba ho phethahatsa projeke ena, le ha bakgathatema ba bang ba nang le seabo sa bohlokwa ho phethahatsweng ha projeke ena le bona e le Komiti ya Naha ya Botsamaisi ba Dikoduwa (NDMC), Lefapha la Ntshetsopele ya Setjhaba (DSD), mmoho le Diofisi tse fapaneng tsa Ditonakgolo tsa diprovense tse anngweng

ke sena. Hodima mona, seabo sa Mekgatlo ya Basebetsi. jwalo ka bakgathatema ba bohlokwa, ba nkuwa e le ba hlokehang mohatong ka mong wa projeke ena ho e beha leihlo le ho netefatsa hore tsohle tse ka bakelang dikgwebo tsa lehae kotsi di a qojwa.

Ho fihlela jwale, ke dikobo tse fetang 28 000 tse seng di filwe batho ka bomong ba bona dibakeng tse 174 mane Kwa-Zulu Natal.

Mokgahlelo wa 1 wa teko mona KZN (kabo ya dikobo) o ile wa bula tsela hore sena se anetswe ho ya mokgahlelong wa bobedi wa projeke ena: ona e bile motjha o tshopodi le ho feta ka ha dieta le diaparo tsena di lokela ho phuthelwa ho ba dipakana bakeng sa batho ka bomong ba bona ho ya dibakeng tse itseng tsa boitshireletso pele di ka nyehelwa bakeng sa kabo.

Mokgahlelo ona wa bobedi wa projeke ha jwale o ntse o tswela pele mane KZN ka mora hore ho etswe teko dibakeng tsa boitshireletso tsa Inanda le La Mercy moo sena se faneng ka monyetla wa hore ho ntlafatswe motjha ona le ho feta.

Ho ya ka Mong. Moeng, ke diaparo tse 25 698 tseo ho fihlela jwale di seng di abetswe dibaka tsa pele tsa boitshireletso tse 31 ho tse 74 mane KZN. Ho phuthelwa, ho hlopha le ho abela dibaka tsa boitshireletso ho ntse ho tswela pele ka yona nako eo ho ntseng ho fihla diaparo tse ding tse hapilweng ho tswa Gauteng, diteboho mona di lebiswa ho ba dikgwebo tsa dikhonteina ba ithaopileng ho thusa ho tsamaisa tsena tse hapilweng ka dikhonteina ho leba dibakeng tse fapaneng tsa naha moo tlhokeho ya tsena e hlwailweng teng.

Ho lebelletswe hore projeke ena e phethelwe mafelong a Pudungwana 2022 ka mora hore ho latele North West le Easter Cape mehlaleng ena ya KZN.

Ho fumana lesedi le fetang lena, ka kopo ikopanye le SARSMedia@sarss.gov.za.